

OLIVIA OGANDO MUREY (SINGING OLIVIA) TRAHANDO PA HUBENTUD



Nos seccion "Hubentud den Movecion" a conversa cu señora Olivia Ogando Murey, kende ta traha hopi activo cu hubentud specialmente pa yuda desaroya e talentonan musical, pero cu tambe ta cubri otro areanan. Olivia ta organiza presentacionnan musical hopi biala na hotel cu talentonan hoben. Pero ta bale la pena pa papia siquiera un tiki di ken Olivia ta.

ARTISTA FOR DI MUCHA: Conoci den e ramo musical como "singing Olivia" el a participa den su temponan di su 14 cu 15 aña di edad, den Caslipso Contest y tambe na aña 1983 el a participa den e Festival OTI representando Aruba, unda cu a gana e "voz di oro".

Na aña 1985 Olivia a bay biba afo un tempo. Prome na St. Marteen unda el a yega di gana e premio unico y cu e ta posee ainda cu ta di ser e unico dama Arubiano cu a yega di gana Road March na St. Marteen cual ta un orguyo cu e ta carga semper. Despues el a bay biba na Merca y a regresa na Aruba na aña 1992, cu e intencion di traha pa hubentud.

DESCUBRIENDO

TALENTONAN: Olivia ta relata lo siguiente:

"Nos cu nos comite Miembro cu ta conoci como "Sait Productionta" cu ta conoci pa e dos festivalnan di canto cu a haya hopi escala na Aruba, esun di Banco y esun di Hotelnan y di nos proximo certamen di beyeza di "damanan gordo" ta bringando hopi fuerte pa mira e posibilidad, cu poder di Dios, di lanta un centro pa hubentud, unda cu por

atende dos grupo: un di edad entre 4 cu 13 y otro di 14 pa 21 aña di edad, unda cu nan por desaroya nan talentonan artistico scondi. Tanto den

canto como obra manual, poesia, actuacion, pintura, etc.

Pa realiza esaki nos mester recauda fondos y ta pesey

nos ta bin cu actividadnan pa publico".

Olivia ta señala cu e centro ta dirigi pa e hobennan di menos recurso, pero tambe esnan cu tin recursonan. Es decir hubentud en general.

PAKICO E META: Olivia ta un persona hopi preocupa pa cu e desaroyonan social y educativo di e hubentud di awendia. E ta indica cu e hobennan di awe no tin loke tabata tin antes. E ta splica su opinion asina:

"Aworaki costo di bida ta mucho halto pa un mayor por duna nan yiunan tur loke nan kier dune. Esaki tin influencia riba cursonan di arte pa e muchanan ya cu e cursonan cu ta existi pa hopi aña tambe tin cu bay cu e fluho di costo di bida y esey ta evita p e muchanan menos afortuna por asisti na dicho cursonan pasobra nan may-

ornan no tin moda pa paga. E idea di e instituto cu nos kier lanta ta pa realiza un trabao na e costo mas abao posibel unda cu tur mucha y hoben por integra y cu no ta un costo financiero pa e mayor.

Si esey sosode lo mi por bisa cu mi ta hopi contento cu mi a yega mi meta".

RESCATA NOS HUBENTUD: Olivia ta señala cu pa medio di un Instituto asina, por kita hopi hoben di e caminda diabolico cu ta yama droga.

"Mi ta hopi preocupa ora mi ta lesa den prensa cu hobennan ta horta, ta ranca tas di turista ta drenta den lugarnan unda cu ningun hende ta laga cent, pero papel so, bo ta nota diariamente cu tin hobennan cu plos ta hayanan cu un tiki droga den su posesion, etc. Tur e desaroyonan aki ta ponemi

pensa cu nan ta haci djis pa hala atencion cual nan tin falta di dje".

MESTER DI AYUDO: Oliva ta menciona cu pa logra e meta aki den cual nan ta trahando masha duro mes, nan tin mester di ayudo inmediato.

Esaki kier meen cooperacion di gobierno, instancianan priva, y tur hende cu tin hubentud na pecho.

"Loke nan por duna ta bonbini. Mi kier pa esaki bira un meta comun di nos comunidad en general, ya cu e problemanan di hubentud ta afecta un y tur, ya cu nos hobennan ta nos futuro".

CONTACTO: "Pa esnan cu kier mas informacion y kier duna un man y cu ta interesa den nos proyecto por skirbi libremente na nos P.O.BOX 2092. San Nicolas".

HUBENTUD DEN MOVECION

Pa: Mercedes Abdul